

Freagairt Bhòrd na Gàidhlig do Cho-chomhairle Comhairle na Gàidhealtachd air sgìrean-sgoile FtG airson Bun-sgoil Chnoc na Creige / Àrainn 3-18 Baile Dhubhthaich

1. Ro-ràdh

Tha Bòrd na Gàidhlig a' cur fàilte ann am prionnsapal, air an iomairt gus sgìrean-sgoile airson Foghlam tro Mheadhan na Gàidhlig (FtG) a stèidheachadh anns na sgoiltean a tha air an liostadh gu h-àrd. Tha am Bòrd ag aithneachadh gu bheil Comhairle na Gàidhealtachd a' gluasad a dh'ionnsaigh a bhith a' stèidheachadh sgìrean-sgoile far a bheil solar FtG ann an sgìre na Comhairle.

Tha an Stiùireadh Reachdail air Foghlam Gàidhlig agus Plana Nàiseanta na Gàidhlig airson 2018-23 mar bhunait airson freagairt a' Bhùird dhan cho-chomhairle seo. Tha e mar bhunait dhan Stiùireadh Reachdail, gum bu chòir FtG a leasachadh agus gum bu chòir fàs a thoirt air agus tha barrachd mion-fhiosrachaidh air seo san stiùireadh.

2. Fiosrachadh Co-chomhairleachaidh

Tha Comhairle na Gàidhealtachd ag ràdh gu bheil iad airson sgìrean-sgoile a stèidheachadh air na h-adhbharan a leanas:

- Tha an Stiùireadh Reachdail air Foghlam Gàidhlig a' moladh gun stèidhich Ùghdarrasan Ionadail sgìrean-sgoile airson FtG.
- Tha dìth soilleireachd ann an-dràsta do phàrantan agus luchd-cùraim a tha ag iarraidh FtG dhan chuid chloinne anns na coimhearsnachdan a tha air am frithealadh leis an t-solar FtG a tha air a liostadh. Tha an t-Ùghdarras Ionadail a' dèanamh na h-eacarsaich a rèir an dleistanais a bhith a' toirt seachad Luach as Fheàrr ann an lìbhrigeadh sheirbheisean.
- Tha an t-Ùghdarras Ionadail air an cleachdadh a chur an sàs de bhith a' toirt seachad còmh-dhail taobh a-staigh astar siubhail reusanta, a thathar a' mìneachadh sa chumantas mar taobh a-staigh 15 mìle bho sgoil a tha a' lìbhrigeadh FtG.

3. Molaidhean na Comhairle

Solarachadh FtG aig Bun-sgoil Chnoc na Creige / Àrainn 3-18 Baile Dhubhthaich.

Ann am prionnsapal tha Bòrd na Gàidhlig a' toirt taic do stèidheachadh sgìre-sgoile soilleir airson solar FtG ann am Bun-sgoil Chnoc na Creige / Àrainn 3-18 Bhaile Dhubhthaich, an dà chuid solar Àrd-sgoile agus Bun-sgoile, mar a mhol Comhairle na Gàidhealtachd.

- Tha Bòrd na Gàidhlig mothachail gu bheil pàrantan air draghan a thogail nach eil Buidheann Sgoiltean Co-cheangailte (BSC) Ghoillspidh mar phàirt dhan sgìre-sgoile, nuair a tha teaghlaichean bhon BSC seo air FtG a fhrithealadh aig Bun-sgoil Chnoc na Creige roimhe.
- Tha sinn a' toirt fa-near gu bheil am pàipear co-chomhairleachaidh ag ràdh gu bheil teaghlaichean à Inbhir Sin, a tha ann an sgìre-sgoile Bun-sgoil Luirg is na pàirt de BSC Ghoillspidh, a' frithealadh FtG an-dràsta. Tha sinn a' cur fàilte air a' mholadh gum faigh na teaghlaichean seo taic siubhail gus an cuir iad crìoch air FtG.
- Bu chòir do Chomhairle na Gàidhealtachd a bhith a' beachdachadh air a bheil e iomchaidh taic siubhail a thoirt air falbh bho theaghlaichean sam bith a tha a' fuireach taobh a-staigh BSC Ghoillspidh san àm ri teachd. Ged a tha sinn a' tuigsinn gum faodadh ùine siubhail bho chuid de sgìrean taobh a-staigh ASG Ghoillspidh a bhith dùbhlach, tha e soilleir gu bheil sgìrean eile ruigsinneach le pàrantan a' taghadh FtG an-dràsta agus roimhe.
- Tha sinn a' cur fàilte air a' mholadh ma dh'fhosgla an t-solair FtG aig Drochaid a' Bhannath a-rithist ri linn barrachd iarrtais, gum feumadh sgìre FtG Bhaile Dhubhthaich atharrachadh, agus sgìre-sgoile ùr FtG fhoillseachadh airson Bun-sgoil Drochaid a' Bhannath.

4. Stiùireadh Reachdail airson Foghlam Gàidhlig

Tha an Stiùireadh Reachdail airson Foghlam Gàidhlig a' moladh gun tèid sgìrean-sgoile a stèidheachadh airson sgoiltean far a bheil Foghlam tro Mheadhan na Gàidhlig (FtG) ri fhaighinn (Earrann 2.53 is 2.54).

Sgìrean-sgoile is Stiùireadh airson Àiteachan a Ghleidheadh do Sgoilearan

- Bu chòir do dh'ùghdarrasan foghlaim sgìrean-sgoile a stèidheachadh airson FtG, agus dh'fhaodadh gum bi iad ag iarraidh beachdachadh air an iarrtas a th' ann airson FtG nuair a tha iad a' stèidheachadh stiùireadh airson nan àiteachan a thèid a ghleidheadh do sgoilearan ann am FtG.

A rèir 2.54:

Bu chòir do sgìre-sgoile airson sgoil le FtG a bhith na sgìre far a bheil an t-ùghdarras foghlaim den bheachd gu bheil e reusanta do chloinn san sgìre sin, a tha airson a dhol gu FtG, siubhal dhan sgoil, agus bu chòir gum bi cothrom ann pàrantan a thàladh gu bhith cur an cuid chloinne gu FtG.



Mar sin, tha Bòrd na Gàidhlig a' cur fàilte ann am prionnsapal, air a' mholadh gun tèid sgìre-sgoile a stèidheachadh airson Foghlam tro Mheadhan na Gàidhlig san sgoil air a liostadh sa cho-chomhairle phoblaich seo.



Bòrd na Gàidhlig,
Taigh a' Ghlinne Mhòir, Rathad na Leacainn,
Inbhir Nis, IV3 8NW

Bòrd na Gàidhlig,
Great Glen House, Leachkin Road,
Inverness, IV3 8NW

+44 [0] 1463 225454
oifis@gaidhlig.scot
www.gaidhlig.scot

